

TARIKH : 9 JANUARI 2023
AKHBAR : BERITA HARIAN
MUKA SURAT : 12

Persiapkan mental, spiritual hadapi jangkakan inflasi 2023

Persiapkan mental, spiritual hadapi jangkakan inflasi 2023

- Dalam mendepani permasalahan ini, al-Quran membimbing manusia dalam dua fasa iaitu pertama, fasa sebelum krisis dengan membentuk kesedaran untuk berbelanja dengan berhemah dan berpada-pada
- Krisis ekonomi adalah satu kitaran pasti wujud pada setiap zaman, abad dan dekad sebelum ini lagi. Walau dahsyat mana pun sesuatu krisis ia pasti berakhir dan pulih seperti sedia kala



Oleh Dr Mohd Shahid Mohd Noh
bhrencana@bh.com.my

Banyak pihak meramalkan tahun ini dunia akan mengalami kemelesetan dan inflasi, kesan serta impak pemulihan ekonomi dunia selepas serangan ganas COVID-19.

Hal ini dinyatakan Gabenor Bank Negara, Tan Sri Nor Shamsiah Mohd Yunus, bahawa Malaysia memasuki fasa mencabar pada 2023 dengan memperlahankan gangguan pada rantaian pembebasan, ketidakpastian konflik geopolitik dan pasaran.

Beliau juga menambah inflasi dijangka lebih tinggi menjadi risiko utama memacu pertumbuhan ekonomi, terutama kepada kuasa beli isi rumah dan aktiviti pelaburan lain. Bagaimanapun, negara kita tidak diimpit dengan risiko kemelesetan sebagaimana dihadapi negara lain.

Laporan prospek ekonomi global terkini menjelaskan tiga perkara menjadi halangan utama kepada pemulihan dan pertumbuhan ekonomi khusus kepada negara membangun antara lainya ialah kadar hutang tinggi, terutama ketika kerajaan memberi pelbagai rangsangan bagi meringankan beban rakyat ketika pandemik.

Kedua, ialah pasaran komoditi tidak menentu menjadikan negara bergantung dengannya berada dalam kitaran boom and bust (berkembang dan meleset), sementara ketiga ialah kesamarataan semakin melebar terutama memabitkan akses kepada vaksin, pendidikan dan penjagaan kesihatan serta peluang pekerjaan, termasuk gaji semakin mengecil.

Perkara ini dilihat sebagai cabaran mendatang pada 2023 mungkin sedikit sebanyak menimbulkan kesan negatif atau positif kepada penduduk di negara ini.

Beberapa inisiatif kerajaan dilihat positif dalam membantu rakyat dan negara menangani inflasi ialah penurunan kadar tol di Lebuhraya Sungai Besi (Besraya) dan Lebuhraya Kajang-Seremban.

dan (LEKAS).

Selain itu, pengkelan tarif elektrik kepada pengguna domestik dan perusahaan kecil dan sederhana (PKS) bakal membantu mengurangkan beban rakyat menghadapi inflasi.

Jika dirujuk belanjawan lalu, kerajaan memperuntukkan RM305 juta bagi membantu usahawan kecil, khususnya di bawah program penyediaan pekerjaan kepada golongan bersasar. Penurunan kadar cukai 2 peratus kepada mereka berpendapatan boleh cukai sebanyak RM100,000 boleh dilihat sebagai usaha membantu meringankan beban rakyat, selain meningkatkan kuasa beli mereka.

Dalam mendepani permasalahan ini, al-Quran membimbing manusia dalam dua fasa iaitu pertama, fasa sebelum krisis dengan membentuk kesedaran untuk berbelanja dengan berhemah dan berpada-pada.

Panduan ini boleh dilihat pada surah al-Furqan, ayat 67 bermaksud: *'Dan juga mereka (yang diridai Allah itu ialah) apabila membelanjakan hartanya, tidak melampaui batas dan bakhil kedekut, dan (sebaliknya) perbelanjaan mereka adalah betul sederhana antara kedua-dua cara (boros dan bakhil) itu.'*

Allah SWT mengajar manusia untuk menyukuri nikmat-Nya dengan berhemah menggunakan pendapatan serta menyalurkan lebihan atau jumlah peri kepada mereka yang berhak serta memerlukan.

Kesederhanaan dan perkongsian

Dapat difahami setiap kurniaan Allah SWT itu sama ada berbentuk nikmat harta, wang dan sebagainya perlu diuruskan dengan penuh kesederhanaan serta memastikan harta itu tidak hanya dinikmati satu golongan, sebaliknya dikongsi bersama menerusi pengeluaran zakat dan sedekah.

Justeru, dua kata kunci utama kepada penguasaan nikmat perlu dipelihara ialah kesederhanaan dan perkongsian. Secara kontranya boleh disimpulkan berlebih-lebihan, membazir, penggunaan secara melampau serta tidak berkongsi nikmat seperti kedekut atau bakhil hanya menjadikan harta semakin sedikit.

Fasa kedua pula Allah SWT menyampaikan panduan bagaimana tindak balas perlu dilakukan manusia ketika berada dalam sesuatu

konflik. Ia boleh dilihat pada ayat 47 dan 48 surah Yusuf bermaksud: *'Yusuf menjawab: Hendaklah kamu menanam bersungguh-sungguh tujuh tahun berturut-turut, kemudian apa yang kamu tuai biarkan dia pada tangkainya; kecuali sedikit kamu jadikan untuk dimakan. Kemudian akan datang selepas tempoh itu, tujuh tahun kemarau besar, akan menghabiskan makanan kamu sedialah baginya; kecuali sedikit daripada kamu simpan (untuk dijadikan benih).'*

Kedua-dua ayat ini memandu Nabi Yusuf merancang menghadapi krisis melanda dengan mengoptimalkan sumber sedia ada dan perlu dikawal mengikut keperluan dan etika penggunaan sesuai.

Bijak urus keperluan, kehendak

Dalam konteks individu hari ini, zaman inflasi adalah pusingan yang pasti berlaku dalam kitaran ekonomi kerana sesetengah ahli ekonomi menganggap inflasi berkadat sederhana adalah perlu bagi memacu pertumbuhan ekonomi sesebuah lokaliti.

Apa yang perlu dilakukan ialah melaksanakan penggunaan sumber optimum dengan mengasingkan perkara keperluan dan kehendak. Hal ini boleh merujuk kepada prinsip 'durruriyyat' (keperluan asas), 'hajjiyyat' (kemestian) serta 'tahsiniyyat' (pelengkap).

Perbelanjaan berbentuk tahsiniyyat atau semata-mata kehendak boleh dikurangkan tanpa mengabaikan keperluan dan kemestian bagi mengekalkan hidup seimbang.

Krisis ekonomi adalah satu kitaran pasti wujud bukan sahaja pada abad ini bahkan wujud pada setiap zaman, abad dan dekad sebelum ini lagi. Walau dahsyat mana pun sesuatu krisis itu ia pasti berakhir dan pulih seperti sedia kala.

Manusia pernah menghadapi krisis dahsyat selepas Perang Dunia Kedua, menyaksikan kehancuran negara utama seperti China, Jepun, Jerman dan beberapa negara Eropah. Namun hari ini negara terabit kembali pulih dan ada yang menjadi lebih maju berbanding sebelumnya.

Natijahnya, kita tidak perlu panik dengan ramalan mengenai inflasi. Ia bukan krisis seperti peperangan, malapetaka gempa bumi yang menghancurkan, sebaliknya krisis pembekalan dan ketidakpastian harga boleh ditangani dengan beberapa mekanisme sedia ada dan diusahakan pelbagai pihak.

Mendepani cabaran ini, perancangan kewangan adalah perkara penting dalam semua keadaan dan suasana. Perancangan juga bukan bermaksud menyekat segala jenis perbelanjaan sehingga menukar secara total gaya hidup.

Apa yang penting, pengawalan perbelanjaan daripada tidak berapa penting kepada hal lebih penting adalah satu perubahan perlu berlaku dalam suasana begini.

Kita juga adalah unit ekonomi penting dalam ekosistem ekonomi di Malaysia. Sekiranya semua kita menyekat secara drastik corak perbelanjaan selama ini, ia mungkin sedikit sebanyak mengganggu aliran wang dalam ekonomi dan boleh menjadi faktor kepada deflasi - satu krisis ekonomi lebih kompleks dan rumit.

